

SAMÞYKKT

um fiðurfé í Fjarðabyggð utan skipulagðra landbúnaðarsvæða

1. gr.

Gildissvið og markmið

Samþykkt þessi gildir um fiðurfé í Fjarðabyggð á svæðum öðrum en skipulögðum landbúnaðarsvæðum og skráðum lögbýlum.

Samþykktin er sett til að tryggja öryggi, hollustuhætti, góða umgengni og fullnægjandi mengunarvarnir vegna fiðurfés í Fjarðabyggð.

Fiðurfé er samkvæmt þessari samþykkt allir fuglar af hænsna og andaætt. Jafnframt nær samþykktin yfir dúfnahald.

2. gr.

Leyfisveitingar og takmarkanir

Áður en fuglahald hefst er skylt að sækja um leyfi hjá Fjarðabyggð. Telji eigna-, skipulags- og umhverfisnefnd að skilyrði til að halda fiðurfé séu fyrir hendi getur hún veitt lögráða einstaklingi eða lögaðila leyfi til að halda ákveðinn fjölda fugla á lögheimili sínu til tiltekins tíma.

Skilyrði leyfisveitinga eru:

- a. að tilskilin leyfi byggingar- og skipulagsyfirvalda liggja fyrir nema að skilyrði í g-lið í 2.3.5. gr. í byggingareglugerð nr. 112/2012 sé uppfyllt.
- b. að umsækjandi hafi ekki gerst brotlegur við lög um velferð dýra nr. 55/2013.
- c. Að fyrir liggja samþykki sameigenda eða leigjanda ef um fjöleignarhús er að ræða. Sama á við ef um er að ræða jörð eða fasteign í óskiptri sameign. Sé umsækjandi leigjandi skal fylgja samþykki leigusala.
- d. að fyrir liggja samþykki íbúa nærliggjandi húseigna í hið minnsta 100 metra radíus frá þeim stað sem halda á fiðurfé.
- e. að ganga skal úr skugga um að hæsnahald eða annað fuglahald hafi ekki verið sérstaklega bannað eða þinglýstar kvaðir séu á húseignum sem koma í veg fyrir að þar sé haldið fiðurfé.
- f. óheimilt er að halda hana.
- g. óheimilt er að halda gæsir.

3. gr.

Fjöldi

Leyfilegt er að halda hænur og endur að hámarki tíu fugla á sömu lóð. Hvað varðar dúfnahald er leyfilegt að halda að hámarki sex dúfur á sömu lóð.

4. gr.

Aðbúnaður

Um almennan aðbúnað og velferð dýra gilda ákvæði laga um velferð dýra nr. 55/2013 og þar að lútandi reglugerð um velferð alifugla nr. 135/2015 og velferð gæludýra nr. 80/2016.

Á lóðum þar sem veitt er leyfi til þess að vera með fiðurfé þarf að vera hæfilega stór kofi sem rúmar þann fjölda af fuglum sem leyfi er veitt fyrir.

Í kringum fuglakofa skal vera fuglaheld girðing, hæfilega stór fyrir útiveru fuglanna og sem fullnægir náttúrulegum þörfum þeirra samkvæmt þar að lútandi reglugerðum um velferð alifugla nr. 135/2015 og um velferð gæludýra nr. 80/2016. Fuglakofi og gerði skulu vera vel innan lóðarmarka viðkomandi lóðar, að lágmarki 3 m. Kofi skal vera meindýraheldur og fóður skal geyma í meindýraheldum ílátum. Til að fyrirbyggja að mýs komist í fóður skulu ílát vera í a.m.k. 35 cm hæð frá jörðu og vera u.þ.b. 60 cm djúp.

Aðgengi að vants- og/eða sandbaði skal vera til staðar fyrir fuglana og fylgja ákvæðum reglugerðar um velferð alifugla nr. 135/2015.

5. gr.
Príf

Prífa skal kofa að lágmarki vikulega.

Skít skal fjarlægja við daglega umhirðu og hann má ekki safnast upp. Hæsnaskít skal farga eða nýta á löglegan hátt. Þegar mokað er úr húsum skal koma hæsnaskít fyrir í lokuðum umbúðum þannig að hann valdi ekki lyktarmengun. Þegar hæsnaskítur er nýttur sem áburður skal plægja hann niður þannig að hann liggi ekki á yfirborðinu. Ef ekki er unnt að nýta skít skal flytja hann í lokuðum umbúðum á móttökustöð fyrir lífrænan úrgang.

6. gr.
Myrkvun

Til að koma í veg fyrir ónæði vegna hávaða frá fuglunum ber að hafa myrkur hjá þeim frá kl. 21.00 til kl. 7.00 alla daga.

7. gr.
Ábyrgð

Lausaganga fiðurfés er með öllu óheimil og ber eigandi fulla vörsluskyldu.

Eigandi fiðurfjár er að öllu leyti ábyrgur fyrir sínum fuglum og ber að koma í veg fyrir að dýrin valdi ónæði í umhverfinu, svo sem vegna hávaða, ólyktar og hvers konar óþrifnaðar.

Eiganda ber að sjá til þess að fuglahaldið laði ekki að meindýr.

8. gr.
Handsömun

Sleppi fuglar frá eiganda eða umráðamanni, skal viðkomandi tafarlaust gera ráðstafanir til að handsama þá. Fiðurfé sem er laust, utan girðinga, skal færa í dýrageymslu á vegum sveitarfélagsins. Ef fuglanna er ekki vitjað innan einnar viku frá handsömun er heimilt að ráðstafa þeim til nýs eiganda eða selja fyrir áföllnum kostnaði. Að öðrum kosti skulu fuglar aflífaðir.

9. gr.
Kostnaður við handsömun

Hafi fugl verið handsamaður er óheimilt að afhenda hann fyrr en að lokinni greiðslu áfallins kostnaðar. Sé eigandi ekki með leyfi til að halda fiðurfé skal afla leyfis og greiða fyrir það áður en afhending á sér stað.

Kostnaður við handsömun, geymslu eða aflífun fiðurfés skal að fullu greiddur af eiganda fiðurfés.

10. gr.
Sjúkdómar

Komi upp sjúkdómar eða smithætta sem að mati sóttvarnarlæknis eða yfirdýralæknis geta skapað hættu fyrir heilbrigði manna, ber að hætta hæsnahaldi tafarlaust og farga fuglum í samráði við heilbrigðisnefnd.

11. gr.
Villt dýr

Óheimilt er að laða að sér og/eða halda villt dýr samanber lögum um velferð dýra nr. 55/2013.

11. gr.
Eftirlit

Eftirlit með því að ákvæðum samþykktar þessarar sé framfylgt er í höndum Heilbrigðisnefndar Austurlands samkvæmt lögum nr. 7/1998, um hollustuhætti og mengunarvarnir.

Fjarðabyggð fer með framkvæmd samþykktarinnar í umboði heilbrigðisnefndar. Fjarðabyggð getur ráðið dýraeftirlitsmenn eða falið starfsmönnum sínum hlutverk dýraeftirlitsmanna. Dýraeftirlitsmenn starfa undir eftirliti og á ábyrgð heilbrigðisnefndar. Dýraeftirlitsmenn geta leitað aðstoðar heilbrigðisnefndar, Matvælastofnunar og lögreglu yfirvalda þegar þörf krefur, t.d. ef

nauðsynlegt er vegna almannahagsmuna, dýravelferðar eða heilbrigðis- og öryggissjónarmiða, að fjarlægja óleyfisdýr.

12. gr.
Afturköllun leyfis

Sveitastjórn getur afturkallað leyfi til hæsnahalds samkvæmt samþykkt þessari ef hæsnahaldið veldur ónæði í umhverfinu, leyfishafi hefur gerst brotlegur við lög um velferð dýra nr.55/2013 eða brotið er gegn samþykkt þessari.

13. gr.
Þvingunarúrræði

Um þvingunarúrræði og viðurlög við brotum gegn ákvæðum samþykktar þessarar fer samkvæmt XVII. kafla laga nr. 7/1998 um hollustuhætti og mengunarvarnir.

14. gr.
Gjaldtaka

Bæjarstjórn er heimilt að setja gjaldskrá í samræmi við 59. gr. laga nr. 7/1998, um hollustuhætti og mengunarvarnir, til að standa straum af kostnaði vegna framfylgdar á samþykkt þessari. Í gjaldskrá eru upplýsingar um leyfis- og eftirlitsgjöld og þann kostnað sem leyfishafi skal bera og kann að hljóta af handsömun, fóðrun og hýsingu fuglanna.

Gjöld vegna aðkomu heilbrigðisnefndar greiðast samkvæmt gjaldskrá Heilbrigðiseftirlits Austurlands.

15. gr.
Úrskurðarnefnd

Heimilt er að kæra stjórnvaldsákvarðanir samkvæmt samþykkt þessari.

16. gr.
Staðfesting og gildistaka

Samþykkt þessi staðfestist hér með samkvæmt 59. gr. laga nr. 7/1998 um hollustuhætti og mengunarvarnir og öðlast þegar gildi.

Fjarðabyggð 19. nóvember 2018

Karl Óttar Pétursson
bæjarstjóri

Samþykkt af eigna-, skipulags- og umhverfisnefnd, 29. október 2018

Samþykkt af bæjarráði, 5. nóvember 2018

Samþykkt af bæjarstjórn, 14. nóvember 2018

